

PETIKAN PERKARA-PERKARA BERHUBUNGKAIT DENGAN URUSAN PILIHAN RAYA

UNDANG-UNDANG TUBUH KERAJAAN NEGERI PERAK

XXX. Maka tiap-tiap orang warganegara yang berumur 21 tahun atau lebih yang bermastautin dalam Negeri ini adalah lulus dia menjadi seorang ahli Dewan Negeri, melainkan dia dilucutkan daripada menjadi seorang ahli oleh Perlembagaan Persekutuan ataupun Undang-Undang Tubuh ini atau pun oleh sebarang Undang-undang demikian di dalam Perkara XXXI.

XXXI. (1) Tertakluk kepada peruntukan-peruntukan Perkara ini, seseorang akan hilang kelayakan daripada menjadi ahli Dewan Negeri jikalau :-

- a) Dia adalah dan telah didapati atau telah dinyatakan tidak mempunyai akal yang sempurna;
- b) Dia seorang muflis (bankrupt) yang belum dilepaskan;
- c) Dia memegang jawatan bergaji;
- d) Setelah namanya dicadangkan masuk pilihan sama ada kepada Parlimen atau pun kepada Dewan Negeri atau setelah bekerja sebagai wakil bagi pilihan raya kepada seorang yang telah dinamai begitu, ia telah mungkir menghantar sebarang

penyata perbelanjaan pilihan raya seperti dikehendaki oleh Undang-undang dalam tempoh dan secara yang dikehendaki,

- e) Dia telah disabitkan suatu kesalahan oleh sesuatu Mahkamah di Persekutuan (atau, sebelum Hari Malaysia, di wilayah-wilayah yang terkandung dalam Negeri-Negeri Borneo atau di Singapura) dan dihukum penjara selama tempoh tidak kurang daripada satu tahun atau denda tidak kurang daripada RM2,000.00 dan ia tidak mendapat ampun;
- f) Dia hilang kelayakan di bawah sebarang Undang-undang berkenaan dengan kesalahan-kesalahan bersangkut paut dengan pilihan raya kepada salah satu daripada dewan-dewan Parlimen atau kepada Dewan Negeri dengan sebab telah didapati salah melakukan satu kesalahan yang demikian atau telah ditunjukkan bersalah melakukan satu perbuatan yang menerbitkan kesalahan yang demikian dalam hal ehwal yang bersabit dengan satu pilihan yang demikian itu, atau
- g) Dia dengan sengaja telah mengambil kerakyatan, atau menjalankan hak-hak kerakyatan dalam sebuah negeri asing atau telah membuat suatu permohonan taat setia kepada sesebuah negeri asing.

(2) Hilang kelayakan seseorang di bawah perenggan (d) atau perenggan (e) Fasal (1) boleh dibatalkan oleh Yang Maha Mulia dan jika sekiranya tidak dibatalkan sedemikian, hilang kelayakan itu hendaklah terhenti pada akhir tempoh 5 tahun

yang dikira mulai dari tarikh penyata yang tersebut dalam perenggan (d) itu dikehendaki dihantar, atau, mengikut mana yang berkenaan, dari tarikh orang yang disabitkan sebagaimana tersebut dalam perenggan (e) dilepaskan daripada jagaan atau dari tarikh denda yang tersebut dalam perenggan (e) itu dikenakan, dan seseorang tidak boleh hilang kelayakan di bawah perenggan (g) Fasal (1) semata-mata oleh sebab sesuatu yang dilakukan olehnya sebelum ia menjadi warganegara.

(3) Walau apa pun yang terkandung dalam peruntukan-peruntukan yang tersebut di atas dalam Perkara ini, di mana seseorang ahli Dewan Negeri menjadi hilang kelayakan dari terus menjadi ahli Dewan itu menurut perenggan (e) Fasal (1), atau di bawah suatu undang-undang seperti yang disebutkan dalam perenggan (f) Fasal (1):-

- a) Hilang kelayakan itu hendaklah berkuatkuasa apabila habisnya tempoh 14 hari dari tarikh dia -
 - i) Disabitkan dan dihukum sebagaimana dinyatakan dalam perenggan (e) yang tersebut di atas; atau
 - ii) Disabitkan atas suatu kesalahan atau dibuktikan bersalah atas suatu perbuatan di bawah suatu undang-undang seperti yang disebutkan dalam perenggan yang tersebut di atas; atau

b) Jika dalam tempoh 14 hari yang dinyatakan dalam perenggan (a) suatu rayuan atau apa-apa prosiding mahkamah lain di bawa berkenaan dengan sabitan atau hukuman itu, atau berkenaan dengan kena disabitkan atau dibuktikan bersalah sedemikian itu, mengikut mana-mana yang berkenaan, maka hilang kelayakkan itu hendaklah berkuatkuasa apabila habisnya tempoh 14 hari dari tarikh rayuan atau apa-apa prosiding mahkamah lain itu dilupuskan oleh mahkamah itu; atau

c) Jika dalam tempoh yang dinyatakan dalam perenggan (a) atau tempoh selepas pelupusan rayuan atau lain-lain prosiding mahkamah yang dinyatakan dalam perenggan (b) itu ada difailkan suatu petisyen mendapat ampun, maka hilang kelayakan itu hendaklah berkuatkuasa sebaik sahaja petisyen itu dilupuskan.

(4) Fasal (3) tidaklah terpakai bagi maksud penamaan atau pilihan raya mana-mana orang ke Dewan Negeri dan bagi maksud tersebut hilang kelayakan itu hendaklah berkuat kuasa sebaik sahaja berlakunya kejadian yang tersebut dalam perenggan (e) atau (f), mengikut mana yang berkenaan,

Fasal (1).

(5) Seseorang yang meletakkan keahliannya dalam Dewan Negeri ini atau mana-mana Negeri lain hendaklah, bagi tempoh 5 tahun bermula dari tarikh perletakkan keahliannya berkuat kuasa, hilang kelayakkan untuk menjadi ahli Dewan Negeri ini.

XXXIII. (1) Jikalau berbangkit sebarang masalah adakah seseorang ahli Dewan Negeri itu telah hilang kelayakan menjadi ahli, maka keputusan Dewan itu hendaklah diambil dan hendaklah muktamad.

Dengan syarat bahawa Perkara ini tidak boleh ditafsirkan sebagai menghalang amalan Dewan menangguhkan sesuatu keputusan supaya langkah-langkah (termasuk langkah-langkah membatalkan hilang kelayakkan) yang mungkin menyentuh keputusannya boleh diambil atau ditamatkan.

(2) Jika seseorang ahli Dewan Negeri menjadi hilang kelayakan di bawah perenggan (c) Fasal (1) Perkara XXXI, atau di bawah suatu undang-undang seperti yang disebutkan dalam perenggan (f) Fasal (1) Perkara XXXI, maka Fasal (1) yang tersebut di atas tidaklah terpakai dan dia hendaklah terhenti menjadi ahli Dewan Negeri, dan kerusinya hendaklah menjadi kosong, sebaik sahaja hilang kelayakkannya berkuat kuasa mengikut Fasal (3) Perkara XXXI.

XXXIV. (1) Jikalau seorang ahli Dewan Negeri itu telah hilang kelayakan menjadi ahli Dewan itu atau jika ia mati makahendaklah kosong kerusinya.

(2) Jikalau seseorang yang hilang kelayakan menjadi ahli Dewan Negeri itu dipilih ke dalam Dewan itu, atau pun jikalau pilihannya itu menyalahi Perkara XXXIII maka hendaklah batal pilihannya jua.

(3) Jikalau pilihan seseorang itu harus menjadi atau akan terbatal di bawah Fasal (2), maka calonnya bagi pilihan itu hendaklah batal jua.

(4) Seseorang tidaklah boleh dengan sahnya dicalonkan bagi pilihan ke dalam Dewan Negeri itu dengan tidak ada persetujuannya.

XXXV. Maka seseorang ahli Dewan Negeri itu bolehlah meletakkan jawatan menjadi ahli dengan menulis surat yang ditandatanganinya dan dialamatkan kepada Yang Dipertua.

XXXVA. Jikalau seorang ahli Dewan Negeri itu dengan tidak mendapat cuti daripada Yang Dipertua tidak hadir pada tiap-tiap perjumpaannya dalam masa 6 bulan, maka bolehlah dewan itu mengumumkan kerusinya kosong.

XXXVI. (1) Duli Yang Maha Mulia hendaklah dari semasa ke semasa memanggil bersidang Dewan Negeri itu dan tidaklah boleh membiarkan tempoh 6 bulan berlalu di antara perjumpaan yang akhir lepas dalam satu persidangan dengan tarikh yang ditetapkan bagi perjumpaan yang pertama dalam persidangan yang dihadapan.

- (2) Duli Yang Maha Mulia bolehlah memberhentikan atau membubarkan Dewan Negeri itu.
- (3) Maka Dewan Negeri itu dikecualikan dibubar sebelumnya, dan hendaklah berjalan terus selama 5 tahun daripada tarikh perjumpaannya yang pertama dan hendaklah dengan sendirinya terbubar pada hujung tempoh itu.
- (4) Bila-bila Dewan Negeri itu dibubarkan, hendaklah diadakan satu pilihan raya dalam tempoh 60 hari daripada tarikh pembubarannya dan Dewan Negeri baru itu hendaklah dipanggil bersidang pada satu tarikh tidak lewat daripada 90 hari daripada tarikh itu.
- (5) Sesuatu kekosongan yang luar jangka hendaklah diisi dalam masa 60 hari dari tarikh yang dipastikan oleh Suruhanjaya Pilihan Raya kekosongan itu berlaku.

Dengan syarat bahawa jika sesuatu kekosongan luar jangka dipastikan pada suatu tarikh dalam masa dua tahun dari tarikh Dewan Negeri hendaklah, mengikut Fasal (3), menjadi bubar, maka kekosongan luar jangka itu tidak boleh diisi melainkan jika Yang Dipertua memberitahu Suruhanjaya Pilihan Raya secara bertulis bahawa kekuatan dari segi bilangan parti yang membentuk majoriti semua ahli Dewan Negeri adalah terjejas oleh kekosongan itu, dan dalam keadaan itu kekosongan itu hendaklah diisi dalam masa enam puluh hari dari tarikh pemberitahuan itu diterima.

